

**PERUTUSAN PEJABAT KETUA PENDAFTAR JKSTR
SEMPENA MENYAMBUT KETIBAAN AIDIL FITRI
BAGI TAHUN 1442 HIJRAH / 2021 M**

Bismillahirrahmanirrahim,

Assalamualaikum warahmatullahi wabarakatuh,

Dengan nama Allah yang Maha Pemurah lagi Maha Penyayang. Segala puji dan syukur kehadiran Allah SWT, Tuhan sekalian alam. Selawat dan salam ke atas junjungan mulia yang dikasihi, Nabi Muhammad SAW, ahli keluarga dan para sahabat baginda.

Semua warga JKSTR yang dirahmati dan dimuliakan Allah,

YAA Ketua Hakim Syarie Terengganu,

YA Hakim Kanan Mahkamah Tinggi Syariah, YA Hakim Mahkamah Tinggi Syariah, Tuan Hakim Mahkamah-mahkamah Rendah Syariah Daerah Negeri Terengganu, Para Pegawai Syariah dan kakitangan serta warga kerja Jabatan Kehakiman Syariah Terengganu yang dirahmati Allah sekalian,

Alhamdulillah, kita telah berjaya menjalani ibadah puasa sepanjang bulan Ramadhan pada tahun ini dan kita telah pun berada di hujung Ramadhan serta di ambang Syawal. Satu Syawal yang bakal menjelang adalah hari yang ditunggu-tunggu oleh seluruh umat Islam setelah sebulan berpuasa. Apa yang penting ialah kita tidak sesekali melupakan tujuan Allah S.W.T. memfardhukan ibadah puasa ke atas kita iaitu untuk menjadikan kita seorang hamba yang bertakwa, dan Aidilfitri adalah sebagai tanda kemenangan dan kembalinya kita kepada fitrah asal kita.

Hari Raya Aidil Fitri disambut bagi menandakan kesyukuran kemenangan kita dalam perjuangan menahan hawa nafsu dari perkara-perkara yang ditegah di sepanjang bulan Ramadhan. Latihan yang telah kita amalkan dalam bulan ini dapat membantu kita membentuk sikap positif yang perlu dalam kehidupan seharian kita seterusnya. Marilah kita sama-sama berdoa, semoga Allah S.W.T. menerima segala amal ibadah kita di sepanjang Ramadhan ini dan kita semua tergolong dalam hamba-hambaNya yang bertakwa.

Pegawai dan warga kerja Jabatan Kehakiman Syariah Terengganu yang dikasihi sekalian,

Sebagaimana yang diketahui umum, seluruh negara Malaysia termasuklah negeri Terengganu telah dikenakan Perintah Kawalan Pergerakan (PKP) 3.0 berkuat kuasa 12 Mei sehingga 7 Jun ini. Beberapa arahan dan sekatan telah dikeluarkan oleh pihak kerajaan bersama pelaksanaan PKP tersebut bagi tujuan menangani pandemik covid 19 gelombang ke-3 yang sedang melanda negara kita, antaranya semua aktiviti rentas negeri dan daerah tanpa kebenaran Polis Diraja Malaysia (PDRM) di seluruh negara tidak dibenarkan, aktiviti ziarah menziarahi pada hari raya Aidil Fitri juga tidak dibenarkan, kehadiran jemaah di masjid dihadkan dan sebagainya. Oleh itu, untuk perayaan Aidil Fitri pada tahun ini juga, kita tidak dibenarkan bergerak merentas negeri malahan tidak boleh merentas daerah untuk balik beraya ke kampung. Kita juga mesti mematuhi SOP sambutan perayaan yang telah ditetapkan oleh kerajaan dengan nasihat Kementerian Kesihatan. Ini merupakan tahun ke-2 kita menyambut Hari Raya Aidil Fitri di dalam tempoh PKP, .

Justeru itu, kemeriahan Aidilfitri kali ini sudah tentu agak berbeza. Peluang untuk kita menziarahi ahli keluarga dan sahabat handai agak terhad. Tiada majlis rumah terbuka atau kenduri-kendara untuk kita hadir dan berjumpa sanak saudara dan rakan taulan. Tetapi, ini tidak bermakna Aidilfitri kali ini tidak disambut dengan kemeriahan. Wujudkanlah suasana kemeriahan dan kegembiraan sambutan Aidilfitri dengan norma baharu bersama ahli keluarga kita. Terus kanlah budaya dan amalan menziarahi ahli keluarga dan sahabat handai serta saling memberikan antara satu sama lain menerusi kecanggihan teknologi yang ada, bersesuaian dengan seruan norma baru oleh pihak kerajaan.

Pegawai dan warga kerja Jabatan Kehakiman Syariah Terengganu yang dikasihi sekalian,

Di beberapa detik akhir Ramadhan yang mulia ini, marilah kita sama-sama memanjatkan doa kepada Allah Rabbul A'lam;

“Ya Allah, di akhir Ramadhan ini, Kau ampunkanlah dosa-dosa kami, dosa ibubapa kami, keluarga kami, sahabat-sahabat kami dan seluruh umat Nabi Muhammad saw Ya Illahi.

Ya Allah, di akhir Ramadhan ini Kau terimalah puasa kami, solat kami, bacaan al-Quran kami, sedekah kami, ibadah kami dan segala amal kebajikan yang kami lakukan Ya Rahman.

Ya Allah, di akhir ramadhan ini, apa-apa kekurangan dalam puasa kami, solat kami dan ibadah kami Kau tutupilah dengan kasih sayang dan rahmat-Mu Ya Rahim.

Ya Allah, di akhir Ramadhan ini kami mohon ringankanlah penghisaban kami, masukkanlah nama kami dalam senarai penghuni syurga-Mu dan lindungilah kami dari azab api neraka-Mu Ya Rabb.

Aamiin...Ya Rabbal 'Alamin.

Akhir kalam, saya mengambil kesempatan ini untuk mengucapkan Selamat Hari Raya Aidilfitri kepada semua, Maaf Zahir dan Batin.

تقبل الله منا و منكم صالح الأعمال "

Allahu Akbar, Allahu Akbar, Allahu Akbar, Walillahil hamd.

Wabillahi Taufik Wal Hidayah, Wasaalamualaikum Warrahmatullahi Wabarakatuh.

Bertarikh pada:

30 Ramadhan 1442H/ 12 Mei 2021.